

Vorrede.

man solche hoch nützliche hölzine Meer Casa auffbauwet vnd brauchet. Dahero/ dieweilen/ wie obeingeführt / von den Meer Porten auß/ vnseren inneren Landen/ soviel vnd mancherlei köstliche Nutzen vnd frommen communicirt werden / solt es dann nicht billich sein/ daß hingegen von vnseren Landen auß/ ein warhafftige gründliche Beschreibung der gewaltigen Mittel vnd Instrumenten (als die Vasselli sein) bis widerumb an die Meerhäfen / ja weiter (nach dem es Gott schicken mag) fortwandere/ vnd anderen rechtschaffnen Architectis vnter die Hand komme? Bey welchem pals ich ohnerschrocken profitirn darff/ daß es nicht genug sey/ ein Schiff/ Galeen, oder ein anders Vassello nur nach geringem Augenmaß / oder auff gerath wol zuerbauwen/ oder nach deme es sich vngefährlich etwann schicken möchte/ sintemahlen nur gar zu wol bekant/ das oft ein Vassello nit fortlauffen will/ wie starck man sich auch immer mit Rudern bemühet: Einzig daher raichend/ daß es etwann zulang/ zubrait/ zuhoch; an seinem Corpore zuplump/ oder aber gar zusubtil gemacht wirdt; dahero es alsdann/ vnd vmb solcher enormitet willen / nit wie man gern wolte seinen Corsum vollbringen kan. Demnach aber jede Artes ihre terminos, Zihl/ Maß vnd Ordnungen haben / damit ihnen jr gebührendes Recht in effecto beschehe; Also erfolgt es in diser Specie der Architectur fürnemblich auch; Da dann mit sonderbarem Fleiß/ vnd Auffmercken auff das Schiffgebäu muß gesehen werden / jedem membro sein rechte Lenge/ Höhe/ Braite / Dicke / vnd Tieffe zuzetheilen. Dann gewißlich ohne dise eigentliche vnd gründliche Wissenschaft/ kan / noch wirdt einziges maisterlichs Vassello, auff dem Meer darob zuschiffen/ nit verfertiget werden. Wann dann abermahlen viel meine Befreündten / vnd andere hochansehenliche Herren vnd Fautorn hierinnen auch ein gründliche Wissenschaft haben wolten/ deswegen mit mir so Mund- so Schriftlich conversirt: So habe ich denselbigen meinen vielgeehrten Herren vnd Gutsgegnern zugefallen/ mehrtheils das jenige / so ich selbert gesehen vnd erpracticiert/ in disem meinem vierten Werck auch in den Truck verfertigen wollen/ beneben mich noch wie jedmahlen entschuldigen/ daß / da man anderst dem Gebäu vnd dessen membris ire eigentliche wolanständige Namen hat geben wollen/ zugleich auch etliche Italianische Wörtter in dem Text mit vnterlauffen müssen/ zweiffle nicht/ es werdens die Verständige gnugsamb begreifen/ vñ sich darnach richten / auch mich mit disem meinem Werck (so vielleicht diser Landen vnd Orten nicht viel getriben/ oder frequentirt worden) so aller wolmeinend also auffgesetzt/ ihnen in Gunsten befohlen sein lassen.

Jch

Architect. Navalis erfordert grossen Fleiß.

Des Autoris propositum.